



TUZLANSKA DEKLARACIJA

*Usvojena na Sedmoj konferenciji o
Evropskoj povelji o zaštiti ljudskih prava u gradovima
u Tuzli, u Bosni i Hercegovini, od strane dolje potpisanih gradova*

Gradovi su prošlost, sadašnjost i budućnost Evrope. Suštinska moć građana nalazi se na lokalnom nivou: tu se izgrađuje demokratija, tu žive i razvijaju se ljudska prava.

Evropska povelja o zaštiti ljudskih prava u gradovima, usvojena prije deset godina u Saint Denisu, želi osigurati trajnu vezu između razvoja gradova i jačanja ljudskih prava. Radi budućnosti čovječanstva, potrebno je sačuvati i unaprijediti vrijednosti kao što su sloboda, jednakost, tolerancija, dostojanstvo, mir, bratstvo, solidarnost, zdrava okolina i nediskriminacija.

Danas se određena temeljna prava građana, i njihov pristup istima (pravo na stanovanje, na kvalitetne javne usluge, na dostojanstven život, na rad), dovode u pitanje uslijed ekonomske krize, sve oskudnijih uslova života, ali i centralizacije, diskriminacije, i nepoštivanja životne okoline.

Učesnici Konferencije u Tuzli, potpisnici ove Deklaracije, podržavaju Evropsku povelju o lokalnoj samoupravi. Oni potvrđuju i principe sadržane u Evropskoj povelji o zaštiti ljudskih prava u gradovima. Povelja nam je omogućila da proglasimo „pravo na grad“ i utjelovimo „pravo na gradsku zajednicu“.

Povelja omogućava udruživanje lokalnih zajednica za jačanje i zaštitu ljudskih prava. Bez namjere da zamjenimo države ili regije u njihovih obavezama u pogledu zaštite ljudskih prava, energično se zalažemo za unaprijeđivanje ovih prava u našim zajednicama.

Prvi puta, naša konferencija se održava u jugoistočnoj Evropi. Ovdje, u Tuzli, u Bosni i Hercegovini, u gradu čija nas historija podsjeća na važnost ljudskih prava i jačanja solidarnosti među gradovima, usvajamo

TUZLANSKU DEKLARACIJU

Lokalne vlasti i akteri lokalnih zajednica, učesnici ove konferencije, zalažu se za razmjenu iskustava u jačanju ljudskih prava, na lokalnom nivou.

Gradovi potpisnici će lokalni nivo pretvoriti u privilegovani prostor društvene inovacije, istinske solidarnosti, i otpora neo-liberalnoj globalizaciji i krizi u zapošljavanju.

Gradovi potpisnici iz onih država, u kojima još uvijek ne postoji pravo glasa za građane koji su strani državljani, zalažu se za ostvarenje ovog prava.

Gradovi potpisnici izražavaju svoju podršku stvaranju veze sa Vijećem Evrope, kroz Opservatorij ljudskih prava u gradovima, koji će predlagati mjere za osiguranje ljudskih prava, i ocjenjivati praksu lokalnih vlasti.

Pozivamo evropske institucije da priznaju ulogu lokalnih vlasti u odbrani i unaprijeđivanju ljudskih prava, i poduzmu konkretne mjere koje će doprinijeti jačanju položaja gradova kao garanta ljudskih prava, nediskriminacije i složnog suživota.



Pozivamo na provođenje istinske decentralizacije koja će stići do svih građana. Istovremeno, recesija i globalna kriza ne smiju biti izgovor za stalno smanjenje udjela javnih sredstava koji pripada lokalnim zajednicama. Napominjemo da lokalne zajednice zadovoljavaju najosnovnije, i svakim danom sve bitnije, potrebe građana.

Pozivamo evropske institucije da svoje zemlje članice pozovu da donesu zakonodavne mjere koje će svim građanima omogućiti uživanje istih prava i mogućnosti učešća u društvenim procesima.

Pozivamo pomenute institucije da zahtjevaju da finansijska sredstva za projekte zaštite čovjekove okoline ne budu samo dostupna vladama zemalja, nego i gradovima koji imaju efikasne i korisne projekte.

Pozivamo evropske institucije da obavežu nacionalne vlasti da u svoja zakonodavstva unesu rigorozne mjere za borbu protiv rasizma, diskriminacije po bilo kojoj osnovi, ekstremizma i drugih vrsta kršenja ljudskih prava.

Pozivamo Vijeće Evrope da svoje zemlje članice pozove da usvoje mjere kojima će dobra koja pripadaju prirodnom, kulturnom i historijskom naslijeđu gradova, biti sačuvana od bilo kog oblika privatizacije, te da osnovna javna dobra – poput pitke vode ili energije za grijanje – mogu biti naplaćivana po cijenama uspostavljenim imajući u vidu socijalne kriterije.

Zahtjevamo da svjetska asocijacija Ujedinjenih gradova i lokalnih vlasti, CGLU, prenese Tuzlansku deklaraciju i doprinese njenoj implementaciji.

Obraćamo se evropskim institucijama i državama članicama s ciljem da elementarna prava, poput prava glasa građana koji su strani državljani, prava na kvalitetne javne usluge, ili na održivi razvoj, budu konačno priznata u Povelji temeljnih prava i Sporazumu o funkcioniranju Evropske unije (Lisabonski sporazum).

Pozivamo sve gradove potpisnike Evropske povelje i ove Deklaracije da ojačaju međusobne veze, što će nam omogućiti da ojačamo našu mrežu "Evrope gradova", te da ostvarimo ciljeve navedenih dokumenata.

Ova Deklaracija će biti dostavljena svim relevantnim evropskim i svjetskim institucijama, gradovima potpisnicima Povelje, kao i međunarodnim asocijacijama lokalnih vlasti, koje će biti pozvane da doprinesu procesu promovisanja Povelje i jačanju njene uloge kao međunarodnog instrumenta na polju ljudskih prava.

U Tuzli, 9. oktobra / listopada 2010.